

無爲集

三

集

馬

集

三

古逸叢書三編之三六

無爲集（線裝一函三冊）

中華書局影印

（北京王府井大街三十六號）

新華書店北京發行所發行
浙江蕭山市古籍印刷廠印刷
統一書號：

ISBN 7-101-00849-6/Z·91

定價：一二五元

無為集卷第十二

碑誌

武信軍節度使謚康簡追封循國公

神道碑

寶元二年秋七月辛丑宗室金紫光祿大夫檢校禮部尚書使持節和州諸軍事和州刺史充本州團練使兼御史大夫上柱國天水郡開國公薨于秦邸之正寢上聞之震悼車駕臨奠親撫衾歛哀慟久之慰恤諸孤恩禮加等贈武信軍節度使追封循國公特賜白金三千兩緡錢

一百五十萬絹五百疋命使監護又遣內省夫人
中貴卹治内外事用度悉出於官太常用一品
鹵簿儀衛以送喪物多于奉先佛祠諸子號莫
過哀乞廬其側至某年某月某日葬于某州某
縣某原禮也太常議謚以謂公質直重厚志尚
敦雅下賢趣善素履安夷和柔之德中外推挹
案謚法曰溫良好樂曰康平易不訾曰簡尚書
省集官老覆復輿論爲允乃謚曰康簡易名之典
兼二法之美也公諱承慶字祐之初名承宗
宣祖皇帝之曾孫太師尚書令秦悼王諱某之

適長孫護國軍節度使兼中書令高密郡慈惠
王諱某之適長子也公天資忠孝才藝超卓器
識宏遠信厚愷悌世以賢公子稱之雍熙中隨
侍高密王出判濟州淳化二年奉宣補衙內指
揮使每入貢至京師太宗必召至禁中詢訪州
郡風俗山水應對詳敏莫不稱旨因改今名乃
授西頭供奉官時濟州圉園屢空監郡劉蒙叟
敷奏上喜顧左右曰奉慶父子曉事盡心公家
因賜金箱玉方二寶帝以寵之濟州舉人程文
應格者多高密王欲盡薦于朝有司以解額難

之王曰賢者太平嘉瑞之王以多士寧周薦賢
乃諸侯之職於是具奏書數貢于春官至今濟
州薦送之數比旁郡爲便自高密王始也公與有
力焉孔子曰聽訟吾猶人也必也使無訟乎書曰
野無遺賢傳曰孝子成父之美公父子見之矣
真宗皇帝祥符四年扈蹕汾陰改東頭供奉官
七年改內殿崇班恭謝天地禮成加銀青光祿
大夫檢校太子賓客兼御史大夫騎都尉八上
玉皇尊號加金紫光祿大夫改內殿承制天禧
元年合祭天地加大水縣開國男食邑三百戶

二年秋八月立皇子昇王為皇太子授內園副使
三年南郊加檢校左散騎常侍進封開國子加
食邑三百戶乾興元年二月皇帝御正陽門加
食邑三百戶上因曲宴謂諸宗室曰汝等在先
朝所歷事節宜各盡所見奏聞公曰先朝事節
備於政要臣嘗扈從車駕封太山祀汾陰朝謁
陵寢幸亳社巡守澶淵以至大酺可謂盛事皆
所親見上曰更記內家甚事無所諱避切欲聞
也公曰容臣退而編錄上進旬日具所見聞進
呈御札褒稱仍許非時上章公於朝政所補非

一而其藁不存於家其慎密如此傳曰古者造
辟而言詭辭而出公之謂也車駕幸後苑賞花
釣魚翌日宗室入謝上曰卿等賞釣樂乎衆曰
甚樂公獨曰臣一憂一樂左右皆愕然失色上
曰大王何所憂曰臣昨日伏見御幄臨淵侍從
數百人側立危欄之上臣不敢不憂旣而龍輿迴
轅賞花宴集上下同驩詠歌太平時當豐稔和
氣充塞臣不得不樂上顧近戚曰大王愛我如
此卿等可學即命取白羅扇御飛白書承慶祐
之四字以賜焉夫危樓舩以忠諫漢史稱之寵

華袞以褒字魚曾史載之公有臨淵之憂帝有書
扇之賜忠以愛君褒以勸善君臣之道可謂盡
矣它日宣射上曰先朝多以卿爲神射今日期
必中鵠公曰臣實無能偶或有中公拜命發箭
雖不出正然皆不敢近鵠上知公之謙抑乃索
御箭連中鵠是時御雙箭前處中央公雙箭在下
正上下相向端直如繩墨瞻者莫不歎仰帝甚
悅賜對衣金帶鞍轡馬各二詔書褒異之詩云
終日射侯不出正方易云勞謙君子有終吉公
得之矣仁宗皇帝即位授內藏庫使加輕車都

尉封天水郡開國侯食邑三百戶天聖二年恭
謝天地加上輕車都尉五年十一月南郊加護軍
食邑三百戶七年九月朝廷敦叙昭武之裔優推
寵命以公乃宣祖皇帝之曾孫秦王之裔長孫
高密郡王之適長子故特持節蔣州諸軍事蔣
州刺史八年南郊加上護軍進封開國公食邑
三百戶明道元年改宮苑使檢校禮部尚書加
柱國二年三月東郊籍田加上柱國食實封一
百戶是歲特授懷州刺史景祐元年公以足疾賜
告調治二年南郊遷和州圍練使加食邑五百

戶寶元元年南郊加食邑食實封二百戶公養疾六載聖睠益隆既宣太醫朝夕診療又時遣內夫人至第撫問非常禮也章獻明肅皇太后臨朝時以公名下一字犯彭城郡王父名欲令改易遣近侍諭之不從一日召於簾前宣問公曰彭城王諱天下所共諱也臣不敢不諱彭城王父諱非天下所諱諱也臣不敢獨諱且臣名先朝所賜安敢私易以諂上識者義之公生平博覽墳典翰墨精妙以至樂律丹術仙錄莫不洞究尤善屬文嘗注易二十卷極天人性命之

理天子覽而嘉歎賜以金幣又著家訓三卷行
于世國朝以來宗室著述自公始也因真宗違
豫公刺血書佛經以進高密王寢疾不脫冠帶
而養上聞之遣內人撫問厚賜以旌過人之行
及扶護先王喪往葬汝州會天旱井涸公夜致
禱明日乃水泉涌出賜詔稱其誠孝之應經曰
事親孝故忠可移於君孝悌之至通於神明於
公見之矣公享年三十有九夫人涇陽郡君乃
中書令和凝之孫也繼室永嘉郡太君虞氏皆
賢懿有輔佐君子之道子六人曰克悟右班殿

直早世曰克繼贈定武軍節度使開府儀同三司建國公曰克絢贈青州觀察使曰克孝今任越州管內觀察使曰克肖贈右監門衛大將軍曰克顧贈昭化軍節度使女十人封號不同各歸顯族一早世一爲比丘尼孫幾人曾孫幾人任某官公教子不以爵祿爲重而重乎忠孝不以貨財爲傳而傳以經術是以太宗朝諸王出鎮藩郡以公父子爲才能真宗訪政事公獻惠言爲多仁宗試文翰詔稱公子克孝秀出本支英宗立宗學教育親族克孝首爲二宗師儒稱

薦而復中上科

神宗朝克孝著孝經傳上進賜

詔稱諭熙寧以來詔試宗室經術公孫叔敖叔冢叔某叔某相繼登第元豐講行祀典擇宗子之無過尤者躬執事于明堂宗廟是時循國子孫與祭者爲最多議者以謂無是父則無是子無是祖則無是孫予觀循國康簡公家訓三篇上篇述祖考昭穆之序陳忠孝禮義之端集古人法語以爲家世之傳中篇篤勵學問慎終言行重道義而輕富貴下篇言所慎在乎九思正心以正身正身以正家仁而尊賢恕以及物具善不

善之積明聽不聽之効于今子孫不忘其訓然
後知義方之教澤流之遠何時而有窮已哉葬
後四十年公子欲以公之善美昭示來世乃具
行實請文以立碑于隧道銘曰

烏戲循國宗室之英忠孝仁厚愷弟信誠
博學多能秉彝典經左右先王政肅刑清
進賢報國邦義以寧錫以寶帶父子寵榮
諫章慎密聖主從繩勞謙終吉射不出正
天旱井涸葬親汝城精禱泉湧感于神明
天子聞之詔褒以旌曰康曰簡懿哉易名

治家訓言 載之簡編 貽于後昆 忠孝之源

公子公孫 世其稱賢 寵祿令問 傳無窮年

故右諫議大夫贈工部侍郎沈公神道碑

沈氏之先出于周文王之子聃季食采於沈因而
命氏漢光祿勳戎徙居會稽之烏程後改烏程
爲吳興郡故沈氏以吳興爲望由漢以來世爲
右族宋有慶之梁有休文至唐潤州司兵叅軍
岌生愉爲懷州都團練判官愉生僕爲同州馮
翊尉僕生師舉爲太常協律郎師舉生籍爲衢
州常山令諱籍即公之高祖考越州剡縣丞諱